

Mwokozi Kamili

Kwa maana mmeokolewa kwa neema, kwa njia ya imani; ambayo hiyo haikutokana na nafsi zenu, ni kipawa cha Mungu.—**Waefeso 2:8.**

Wazo kwamba haki ya Yesu Kristo imewekwa juu yetu, sio kwa sababu ya kustahili kokote kwa upande wetu, bali ni kama zawadi ya bure kutoka kwa Mungu, ni wazo la thamani. Adui wa Mungu na mwanadamu hataki ukweli huu uwasilishwe kwa uwazi zaidi; kwa maana anajua kwamba ikiwa watu wataupokea kikamilifu, uwezo wake utaharibiwa. Ikiwa anaweza kudhibiti akili ili kwamba mashaka na kutokuamini na giza vitengeneze uzoefu wa wale wanaodai kuwa wana wa Mungu, anaweza kuwashinda kwa majaribu.

Ile imani sahili ambayo inamwamini Mungu katika Neno Lake inapaswa kuhamasishwa. Lazima watu wa Mungu wawe na imani ambayo itaishikilia nguvu ya Mungu; “Kwa maana mmeokolewa kwa neema, kwa njia ya imani; ambayo hiyo haikutokana na nafsi zenu, ni kipawa cha Mungu” (Waefeso 2:8). Wale wanaoamini kwamba Mungu amesamehe dhambi zao kwa ajili ya Kristo, wasije wakashindwa kwa njia ya majaribu kusonga mbele katika kuvipiga vita vizuri vya imani. Imani yao inapaswa kuendelea kukua hadi maisha yao ya Kikristo, kadhalika na maneno yao, yatakapotangaza, “Damu yake Yesu Kristo ... yatusafisha dhambi yote” (1 Yohana 1:7).

Ikiwa tunataka kuwa na roho na nguvu ya ujumbe wa malaika yule wa tatu, lazima tuwasilishe sheria na injili pamoja, kwa kuwa zinaenda pamoja. Kama vile nguvu kutoka chini inavyowachochea wana wa kuasi ili kuibatilisha sheria ya Mungu, na kuikanyaga kweli ya kwamba Kristo ni haki yetu, nguvu itokayo juu inasukuma mioyo ya wale walio waaminifu ili kuiinua sheria, na kumwinua Yesu kama Mwokozi kamili. Nguvu ya Mungu isipokuwa imeletwa kwenye uzoefu wa watu Wake, nadharia na mawazo ya uongo yataziweka nafsi utumwani, Kristo na haki Yake ataondolewa kwenye uzoefu wa wengi, na kisha imani yao itakuwa haina nguvu au uzima...

Lazima watu wafundishwe kwamba Yesu ni wokovu na haki yao. Ni kusudi la Shetani alilodhamiria ili kuzizuia nafsi zisimwamini Kristo kama tumaini lao la pekee; kwa maana damu ya Yesu isafishayo kutoka katika dhambi yote ni yenye ufanisi kwa niaba ya wale tu wanaoamini katika ustahilifu Wake, na wanaoutoa mbele za Baba kama vile Habili alivyotoa katika sadaka yake...

Mzigo wa ujumbe wetu sio tu amri za Mungu, bali imani ya Yesu. Nuru angavu inang'aa njiani mwetu leo, na inaongoza kwenye kuongezeka kwa Imani katika Yesu. Tunalazimika kupokea kila mwale wa nuru na kutembea ndani yake.... Nuru iliyoongezwa inapotolewa, lazima watu wabadilishwe, wainuliwe, na kutakaswa nayo (Gospel Workers, 161, 162).

Kisha utakuwa na haki kuuendea mti wa uzima, na kula majani na matunda ya uzima ... na kuishi milele katika furaha kamilifu (Youth's Instructor, Agosti 1, 1852).